



ILIDŽA

INFORMATIVNI BILTEN OPĆINE ILIDŽA
Ilidža • Februar 2014. • Broj 124



OBILJEŽEN DAN NEZAVISNOSTI BiH





SVEČANA SJEDNICA OPĆINSKOG VIJEĆA

Svečanom sjednicom Općinskog vijeća obilježen 1. mart, Dan nezavisnosti BiH



U povodu 1. marta, Dana nezavisnosti Bosne i Hercegovine, 28. februara 2014. godine u Multifunkcionalnoj sali održana je svečana sjednica Općinskog vijeća Ilidža.

Nakon odavanja počasti, učenjem Fatime i minutom šutnje, svim poginulim u proteklom ratu, rahmetli načelniku Ameru Čenanoviću, umrlim vijećnicima i uposlenicima općine, predsjedavajuća Općinskog vijeća Smiljana dr. Viteškić podsjetila je prisutne o značaju ovog važnog datuma za našu zemlju.

„Da li ste za nezavisnu i suverenu Bosnu i Hercegovinu, državu ravnopravnih naroda i građana-Bošnjaka, Srba i Hrvata i drugih naroda koji u njoj žive, pitanje je koje je građanima BiH postavljeno 1. marta 1992. i na koje je većina (64 posto) odgovorila potvrdno, to je pitanje koje je uvijek vrijedno i korisno ponavljati. Referendum za nezavisnost BiH održan je na preporuku Arbitražne komisije međunarodne konferencije o Jugoslaviji, u završnoj fazi disolucije bivše SFRJ. Referendum su nadgledali posmatrači OSCE-a i tadašnje Evropske zajednice i 2.500 posmatrača je dalo izuzetno visoku ocjenu kvaliteti provedenog referenduma. Bio je to demokratski i legalan čin, kojim je nakon vijekova tuđih uprava BiH dobila nezavisnost i suverenitet. Na osnovu rezultata referenduma Vijeće ministara Evropske unije je 06. aprila 1992. u Briselu donijelo odluku o međunarodnom priznavanju Bosne i Hercegovine“, prisjetila je predsjedavajuća Općinskog vijeća Smiljana dr. Viteškić.

Prema njenim riječima ono što je uslijedilo nakon međunarodnog priznavanja BiH, bili su dotad neviđeni mržnja, zlo i tama, vođeni željom naših neprijatelja da raskomadaju Bosnu i Hercegovinu.

„Uslijedio je dotad neviđen, dug i krvav rat. Bila je to brutalna agresija na našu zemlju, njene građane i narode, na sve ono što su generacije Bosanaca i Hercegovaca zajednički stvarale kroz istoriju. Zatečeni mržnjom i nasiljem, ipak smo se organizovali i sačuvali našu jedinu domovinu. Naša hrabrost zadivila je svijet“ kazala je u svom govoru Viteškić.

Dodala je da vječno trebamo biti zahvalni onima koji su branili ovu zemlju, a posebno onima koji su u agresiji dali svoje živote i onima koji su se časno borili.

„Nažalost, još ima onih koji 1. mart ne priznaju kao Dan nezavisnosti iako žive u ovoj zemlji, iako je ovo njihova domovina. Iako se svakodnevno borimo sa njima, sa bolom zbog gubitka dragih osoba, bolom zbog invalidnosti siromaštva i nezaposlenosti, svoju zemlju moramo graditi, razvijati i jačati, kako materijalna dobra, tako i solidarnost, međuljudske odnose i poštivanje različitosti. Historija nas je naučila da Bosna i Hercegovina ide nepovratno naprijed samo onda kad se svi njeni građani i narodi u njoj osjećaju kao svoji na svome. Oni koji su rođeni 1992. godine sada su odrasli ljudi, a oni moraju dovršiti odgovor na referendumsko pitanje iz 1992. god. i nastaviti graditi BiH u kojoj su svi ljudi jednaki, bez obzira na njihovu vjeru, etničko ili političko opredjeljenje, Bosnu i Hercegovinu u kojoj vladaju pravda i razum“ istakla je na kraju svog govora predsjedavajuća Općinskog vijeća Smiljana dr. Viteškić, te svim građanima uputila čestitku za Dan nezavisnosti naše jedine domovine.

Učenici Pete osnovne škole izveli su prigodan program za mnogobrojne zvanice iz javnog života sa područja općine Ilidža.

Vanredna sjednica Općinskog vijeća



Općinsko vijeće Ilidža 14. februara 2014. godine održalo je prvu vanrednu sjednicu sa jednom tačkom dnevnog reda "Sigurnosna situaciju u općini Ilidža a povodom aktuelnih dešavanja u Kantonu Sarajevo i Federaciji Bosne i Hercegovine". Načelnik PU Ilidža Mevludin Halilović podnio je izvještaj o sigurnosnoj situaciji na području općine Ilidža. Općinsko vijeće Ilidža primilo je k znanju informaciju načelnika Policijske uprave Ilidža o tome da je sigurnosna situacija na području općine Ilidža stabilna.

Općinsko vijeće smatra da građani Bosne i Hercegovine imaju pravo na mirne i nenasilne proteste kojima bi se ukazalo na teško političko-ekonomsko-socijalno stanje u državi i podržava sve opravdane zahtjeve prema vlastima da nagomilane probleme efikasnije rješavaju.

Općinsko vijeće poziva sve aktere aktuelnih dešavanja da mjerama razumne politike ne dozvole manipuliranje sa opravdanim socijalno-ekonomskim zahtjevima kako u stranačke

svrhe, svrhe anarhije, svrhe međuetničkog nepovjerenja ili svrhe rušenja institucija Bosne i Hercegovine, te da ulože dodatne napore na što bržem prenošenju dijaloga sa ulice u institucije sistema, u cilju smirivanja situacije i hitnog iznalaženja rješenja za navedene opravdane zahtjeve građana. Od načelnika Policijske uprave Ilidža se očekuje da u svakodnevnoj komunikaciji sa općinskim načelnikom, rukovodstvom Općinskog vijeća i drugim formalnim i neformalnim koordinacionim tijelima, organizacijama i grupama građana Općine Ilidža poduzmu sve mjere neophodne za jačanje sigurnosti građana kao i javnog reda i mira na području općine Ilidža. Zaključeno je i da zvanična delegacija Općine Ilidža posjeti Općinu Centar i da da podršku za što brže osposobljavanje i funkcionisanje Općine kao jedinice lokalne samouprave, kao i povrijeđene policajce u bolnicama u Sarajevu. Općinsko vijeće Ilidža donijelo je odluku o odobravanju 70.000 KM iz budžeta za opremanje Policijske uprave Ilidža.





REDOVNA SJEDNICA OPĆINSKOG VIJEĆA

Odluka o najvećim priznanjima Općine Ilidža

Općinsko vijeće Ilidža na 14. sjednici održanoj 27. februara 2014. godine u Multifunkcionalnoj sali Općine Ilidža donijelo je Odluku da se najveće priznanje Općine Zlatna plaketa dodijeli kolektivu „Hoše komerc“, a pojedinačne Džemalu Bulbulu (posthumno) i dr. Hasanu Leti. Srebrna plaketa dodijelit će se Husi Ramiću, Miroslavu Močeviću i Seadu Baliću, te kolektivna „Aida Commerce“ d.o.o. Sarajevo. Zahvalnice će dobiti: Hamdija Hrbatović, Dževad Ljeskovića, Džemal Hurić, Vatrogasno društvo Ilidža „Kenan Slinić“, Ekološko udruženje „Aleja“, Elis Memić, te Udruženje za sport i rekreaciju „Sen“. Priznanja će biti uručena 12. marta na Dan Općine Ilidža.

Odluka o izmjenama i dopunama odluke o građevinskom zemljištu

Općinsko vijeće Ilidža je, na 14. redovnoj sjednici donijelo Odluku o izmjenama i dopunama odluke o građevinskom zemljištu na području općine Ilidža. Visina naknade za pogodnost građevinskog zemljišta - rente utvrđuje se rješenjem o dodjeli zemljišta na korišćenje zbog građenja. Naknadu za prirodne pogodnosti (renta) dužan je platiti i investitor koji gradi objekat na građevinskom zemljištu u privatnoj svojini. Kako stoji u odluci, pravnim licima kao investitorima građevina može se odobriti obročno plaćanje naknade za pogodnost lokacije - rente, i to na dvanaest mjeseci. Uz zahtjev za odobravanje obročnog plaćanja, investitor - pravno lice je dužno dostaviti dokaze osiguranja potraživanja (mjenicu, založnu izjavu, bankarsku garanciju itd.). Odobrenje za plaćanje na rate za investitore - pravna lica prethodno odobrava općinski načelnik i nakon toga sa investitorom zaključuje sporazum kojim će se regulisati način plaćanja i osiguranje potraživanja.

Fizičkim licima kao investitorima građevina kao i onima koji su pravovremeno podnijeli zahtjev za legalizaciju zaključno sa 31. decembrom 2012. godine, odobrit će se obročno plaćanje naknade za pogodnost lokacije - rente, i to na dvanaest mjeseci. U slučajevima u kojima je podnesen zahtjev za obročno plaćanje, od strane investitora - fizičkih lica. Služba za imovinsko-pravne, stambene, geodetske poslove i katastar nekretnina sačinjava. Rješenje kojim utvrđuje visinu rente, te plaćanje naknade u ratama. Ukoliko pravno ili fizičko lice ne plati utvrđene naknade za zemljište i rentu u roku propisanom rješenjem, a podnese zahtjev za poništenje rješenja zbog nemogućnosti plaćanja, Općinski načelnik će putem Službe za imovinsko-pravne, stambene, geodetske poslove i katastar nekretnina poništiti rješenje odnosno Općinskom vijeću podnijeti prijedlog za poništenje istog.



Informacija o praćenju stanja ugroženosti od poplava

Općinsko vijeće Ilidža informisano je i o praćenju stanja ugroženosti od poplava na svim rizičnim područjima.

U okviru preventivnih mjera zaštite od poplava, a prema informaciji Službe za razvoj, investicije i komunalne poslove, čišćenje korita rijeke Miljacke počelo je 05. decembra 2013.godine. Vrijednost ugovorenih radova je 43.323,34 KM, a izvođač radova je "Stambolić" d.o.o.

Projekat je finansiralo Ministarstvo privrede Kantona Sarajevo uz nadzor Zavoda za izgradnju Kantona Sarajevo.

Prema elaboratu firme "ES HYDROTEHNICS" d.o.o po kojem je rađeno uređenje korita rijeke Miljacke, očišćeno je devet sprudova (nanosa) i izrađen je kameni nasip na dijelu obale koji do sada jedino nije bio regulisan i koji je predstavljao opasnost od izlivanja rijeke kod ul. Luke do br.16.

Na redovnoj sjednici Općinskog štaba CZ-a održanoj 09. decembra 2013.godine usvojen je plan korištenja sredstava ostvarenih od posebne naknade za zaštitu od prirodnih i drugih nesreća općine Ilidža za 2014.godinu i to za provođenje preventivnih mjera zaštite i spašavanja u iznosu od 50.200,00 KM, kao i nastavak regulacije rijeke Dobrinje, te hitne intervencije na čišćenju kritičnih mjesta vodotoka.

U toku je i nabavka još dva čamca, prsluci za spašavanje i ostala oprema potrebna za efikasniji rad službe zaštite i spašavanja od poplava.

Kako nije bilo velikih padavina stanje svih vodotoka na području općine Ilidža je zadovoljavajuće, rečeno je u Informaciji. Načelnik PU Ilidža Mevludin Halilović prezentirao je na sjednici Općinskog vijeća Informaciju o stanju kriminaliteta, javnog reda, mira i saobraćaja na području naše općine.



Prijedlozi akata o regulisanju imovinsko-pravnih odnosa

Vijeće je na sjednici usvojilo prijedlog akata o regulisanju imovinsko-pravnih odnosa i to prijedloge zaključaka o neprihvatanju ponuda sljedećih nosilaca prava korištenja: Vidić Rajko, Holjan Edina, Zametica Hamid, Džambić Edin, Memić Avdija, Ikić Nihad, Ikić Nadina, Huremović Zehra, „Sinkro“ d.o.o. Sarajevo, Lokvančić Čazim, Rastoder Adnan, Sladaković Milivoje i Kaltak Azem. Usvojeni su i prijedlozi rješenja o rješavanju imovinsko-pravnih odnosa u svrhu legalizacije stambenih objekata po zahtjevima Muslić Kemala, Pandžo Ekrema, Jugo Izeta, Bayram Halil Ibrahima i Šabanović Zihnije te prijedlozi rješenja o rješavanju imovinsko-pravnih odnosa u svrhu prestanka prava korištenja po zahtjevima Mulaosmanović Mustafe, Kovač Mirsada i Nikolić Dragice i prijedlog rješenja u svrhu prestanka prava raspolaganja po zahtjevu Prevljak Fikreta. Usvojeni su i prijedlozi rješenja o davanju saglasnosti za otuđenje nedovršene stambene zgrade zajedno sa zemljištem pod zgradom po zahtjevima Begović Lidije, Mahmutović Fatime, Radojević Mirka i Koljenović Nazifa i prijedlog rješenja o preuzimanju gradskog građevinskog zemljišta radi izgradnje saobraćajnice XII transverzala po prijedlogu Kantona Sarajevo od vlasnika Hrljević Ivana, Pocrnjić Branke i drugih i po zahtjevu J.P. „Elektroprivreda“ BiH d.o.o. Sarajevo-podružnica „Elektrodistribucija“ Sarajevo od vlasnika Krišnik Stoje i drugi.

Izveštaj o radu i Program rada Pravobranilaštva Općine Ilidža

Vijeće je usvojilo Izveštaj o radu za 2013. godinu i Program rada za 2014. godinu Pravobranilaštva Općine Ilidža.

U izvještajnom periodu pravobranilaštvo je obavljalo poslove iz nadležnosti koje su utvrđene zakonom i odlukom o pravobranilaštvu kao i drugim zakonima u zastupanju u postupcima pravne zaštite imovine i imovinskih interesa pred sudovima u sudskim postupcima, organima uprave i u upravnim sporovima, davalo mišljenja vezano za dodjelu gradskog građevinskog zemljišta, potvrđivanje ugovora o kupoprodaji stanova na koje postoji stanarsko pravo, kao i u drugim predmetima u kojima je nadležno pravobranilaštvo za odlučivanje.

U Programu rada za 2014. godinu, Pravobranilaštvo Općine Ilidža, će kontinuirano raditi na efikasnoj zaštiti imovine i imovinskih interesa općine, te kroz saradnju sa drugim nadležnim organima i institucijama ubrzati realizaciju svih pokrenutih predmeta. U narednom periodu aktivnosti Pravobranilaštva Općine Ilidža bit će usmjerene na poduzimanje mjera radi pravne zaštite imovine i imovinskih interesa općine, afirmisanju svih vidova preventivne djelatnosti, kontinuirano praćenje pojava i problema vezanih za primjenu zakona u praksi i organizovanju radnih dogovora sa općinama i drugim organima radi postizanja boljih rezultata u zaštiti imovine općine. Pored navedenog obavlaće i druge poslove koji su u nadležnosti Pravobranilaštva.

Izveštaj o radu i program rada Jedininstvenog općinskog organa uprave, stručnih i posebnih službi

Općinsko vijeće usvojilo je Izveštaj o radu za 2013. godinu, Program rada za 2013. godinu Jedininstvenog općinskog organa uprave, stručnih i posebnih službi i Izveštaj o upravnom rješavanju upravnih stvari u upravnom postupku za 2013. godinu.

U izvještaju o radu istaknuto je da su aktivnosti općinskih organa bile usmjerene na realizaciju utvrđenih obaveza, zaključaka Vijeće i obavljanju drugih poslova koji su zakonom ili na drugi način stavljeni u njihovu nadležnost. Poslovi kantonalne uprave koji su zakonom preneseni na Općinskog načelnika i poslovi lokalne samouprave, iz samoupravnog djelokruga općine, obavljaju se u službama za upravu. Stručni i tehnički poslovi za potrebe Općinskog vijeća i načelnika obavljaju se u stručnim i posebnim službama. Organi uprave su u svim oblastima kontinuirano radili na sprovođenju utvrđene politike i neposrednom izvršavanju zakona, podzakonskih akata, drugih propisa i općih akata, rješavali u upravnim stvarima, vodili propisane evidencije i izdavali isprave, pružali pravnu pomoć u ostvarivanju i zaštiti prava građana, te obavljali druge stručne i upravne radnje. Posebna pažnja posvećena je razvojnim projektima, stvaranju uslova za otvaranje novih i dovršenje započetih projekata, posebno aktivnostima vezanim za provođenje integrisanog sistema upravljanja prema zahtjevima ISO 9001:2008 i sistema okolinskog upravljanja EN ISO 14001:2004, na osnovu certifikata od strane verifikacijske kuće Tuvadrija od 1. oktobra 2012. godine.

Programom rada utvrđeni su zadaci i opredjeljenja koji će se izvršiti u 2014. godini, a koji prizilaze iz zakona, utvrđene politike i ekonomskog razvoja općine, sistematizovani po službama sa naznačenim rokovima za njihovo izvršenje. Pored planiranih zadataka, organi uprave izvršit će i druge zadatke koji zakonom, odlukama Općinskog vijeća ili na drugi način budu stavljeni u nadležnost ovih organa, a koji su od značaja za ostvarivanje lokalne samouprave i ekonomskog razvoja općine. Jedininstveni općinski organ uprave Općine Ilidža, stručne i posebne službe će u oblastima koje obuhvataju poslove za koje su formirane kontinuirano raditi na sprovođenju općinske politike i neposrednom izvršavanju zakona, podzakonskih akata, drugih propisa i općih akata, rješavati u upravnim stvarima, voditi propisane evidencije i izdavati uvjerenja i druge isprave, te obavljati druge upravne i stručne radnje. Posebna pažnja posvetit će se razvojnim projektima, stvaranju uslove za otvaranje novih i dovršenje započetih projekata, kroz stalno poboljšanje stanja u pojedinim oblastima. U ostvarivanju programskih zadataka, postupat će se u skladu sa Projektom poboljšanja poslovnog okruženja i konkurentnosti na lokalnom nivou.



Memić: Potrebno obezbijediti odvijanje nastave sa svim uposlenim

Zbog učestalih nesporazuma u kolektivu Osnovne muzičke škole Ilidža, a koji se odražavaju na učenike ove javne ustanove, načelnik Općine Ilidža prof. dr. Senaid Memić, održao je sastanak s nekoliko uposlenika ovog kolektiva, dok drugi nisu željeli prisustvovati.

Sastanak je održan, 21. februara u Osnovnoj muzičkoj školi Ilidža.

Načelnik Memić je iznio i prijedlog mjera za stabilizaciju stanja u Osnovnoj muzičkoj školi.

“Cilj je obezbijediti odvijanje nastave sa svim uposlenim, inventuru stanja materijalno – tehničkih sredstava u školi, sastanak sa roditeljima kako ne bi bilo uplitanja roditelja, tražiti saglasnost Vlade Kantona Sarajevo za ispunjavanje onog što se dogovori, uvesti v.d odnosno mentora ili medijatora dok se stanje ne dovede u red (na račun Općine) te zaštititi status direktora i sve i jednog uposlenika, kao i dignitet osoblja” rekao je, između ostalog, načelnik Memić.

Sastanku su prisustvovali i vijećnici Opinskog vijeća Ilidža kao i dio uposlenika ove javne ustanove.

“Učenici ne smiju biti predmet ničije političke manipulacije, niti zloupotrebe, nastava treba da se odvija normalno, a ne da se ispisuju djeca zbog sitnih interesa pedagoga. Ovdje treba da se donose medalje s takmičenja, da se uživa u radu ovih učenika” dodao je Memić, što su prisutni pozdravili aplauzom.



Direktori osnovnih i srednjih škola podržali načelnika

Načelnik Općine Ilidža prof. dr. Senaid Memić razgovarao je 28. februara sa direktorima osnovnih i srednjih škola sa područja ove općine.

Tokom razgovora bilo je riječi i o problemima u Osnovnoj muzičkoj školi Ilidža. Tom prilikom direktori su podržali načelnika u njegovim nastojanjima da pronade rješenje za prevazilaženje problema u ovoj obrazovnoj ustanovi.

Saopćenje za javnost

Povodom posjete JU Osnovna muzička škola Ilidža, 21. februara 2014. i moje namjere da se uključim u rješavanje nagomilanih problema u ovoj obrazovnoj ustanovi javnost želim informisati da je moja dužnost kao načelnika Općine Ilidža aktivno uključivanje u prevazilaženje svih problema sa kojima se suočavaju građani.

Unatoč činjenici da ustavno nemam nadležnosti ni mehanizme direktnog rješavanja ovog problema, koji se već duže vrijeme odražava na učenike i uposlenike ove obrazovne institucije odlučio sam u prostorijama ove škole, koja je izgrađena uz podršku Općine Ilidža, da se napokon na jednom mjestu okupe svi akteri.

Svakodnevno sam pozivan od strane Vijeća roditelja zvanično te od roditelja privatno da se u skladu sa autoritetom koji su mi dali građani ove općine na izborima, angažujem u prevazilaženju nezahvalne situacije u kojoj prije svega ispaštaju djeca i oduzima im se elementarno ljudsko pravo na adekvatno obrazovanje.

Učenici ne smiju biti predmet ničije političke manipulacije, niti zloupotrebe, nastava treba da se odvija normalno, a ne da se degradira ova ustanova zbog sitnih interesa uposlenika. Prioritet je svakako odgoj, obrazovanje i vaspitanje naše djece.

Zbog komplikovane političke situacije u Vladi Kantona Sarajevo, te upražnjene pozicije ministra za obrazovanje, nauku i mlade, sav teret u školi se sveo na roditelje i uposlenike.

U toku februara ove godine imao sam sastanke sa svim stranama, predstavnicima Vijeća roditelja, sindikata, predstavnicima političkih partija koji djeluju u Općinskom vijeću Ilidža i razgovarao o modusima prevazilaženja stanja u školi. Te akcije mene kao općinskog načelnika i predstavnika Općinskog vijeća Ilidža, uslijedile su na poziv Vijeća roditelja JU Osnovna muzička škola (dopis datum: 19.12.2013. g koji vam šaljem u prilogu).

Predstavnici Vijeća roditelja eksplicitno zatražili su moj direktni angažman jer se resorno ministarstvo oglušilo na njihove svakodnevne zvanične i nezvanične pozive da urade svoj posao.

Želio bih naglasiti da ovo pitanje nije političko, niti ga roditelji koji žele najbolje za svoju djecu i školu ne posmatraju na taj način. Stavljanje događaja od 21. februara 2014. godine u kontekst djelovanja jedne političke partije je jedan spin i zlonamjerno degradiranje mene kao ličnosti, načelnika i mojih namjera, prikazujući ih drugačijim od željenog.

Općina će i dalje biti aktivni sudionik, element kompromisa i pokretač svih procesa koji vode ka rješavanju problema u interesu za školu, njene učenike, uposlenike i lokalnu zajednicu.

Razne podvale, klevete i neuspješni pokušaj ocrnjivanja mog imena neće zaustaviti moj otpor prema ovakvom lošem stanju u jednoj od najelitnijih i najznačajnijih obrazovnih ustanova na području općine Ilidža.

Nakon događanja u JU Osnovna muzička škola Ilidža moram informisati javnost da se vrše gnusne akcije omalovažavanja i ismijavanja mene kao načelnika i kao čovjeka. Jutros (24. februara) na Ilidži su osvanuli plakati koji beskrupolozno vrijeđaju zdravu pamet i koriste se u bespotrebne političke napade na mene. Također, želim da vas obavijestim da na društvenim mrežama dobijam prijetnje od ljudi koji se kriju iza lažnih profila, a to me neće spriječiti da dam svoj doprinos u rješavanju ovog problema i kao čovjek i kao načelnik svih građana Općine Ilidža.

Načelnik Općine Ilidža

Načelnik položio cvijeće na mezar prvog predsjednika Alije Izetbegovića

U povodu obilježavanja Dana nezavisnosti 1. marta načelnik Općine Ilidža prof. dr. Senaid Memić sa delegacijom boračkih udruženja sa područja ove općine položio je cvijeće na mezar prvog predsjednika BiH Alije Izetbegovića.



Uručene gume GRAS-u

Općina Ilidža donirala je 16 guma za potrebe JKP "GRAS" za autobuski saobraćaj. Nabavljene gume uručili su načelnik Općine Ilidža prof. dr. Senaid Memić i Fikret Prevljak, izaslanik Općinskog vijeća Ilidža, 18. februara u krugu ove firme.

„Nakon inicijative Vijeća i iskazane potrebe stanovnika za normalizaciju saobraćaja na relaciji Hrasnica-Ilidža, Ilidža-Sokolović-Kolonija, te Ilidža-Rakovica, zajednička delegacija Općine i Vijeća posjetila je Gras i s čelnim ljudima razgovarali su o rješavanju ovog problema. Kako je preduzeće GRAS u izuzetno teškoj situaciji, na tom sastanku je rečeno, da je jedan od problema i nedostatak guma, kako bi se osposobila tri autobusa. I tako je Općina uspjela osigurati sredstva u iznosu od 7.000 KM i kupila gume, a sve u interesu normalizacije saobraćaja na navedenim lokacijama“ kazao je, između ostalog, načelnik Memić.

Fikret Prevljak rekao je da ovo uspješno realizovana zajednička inicijativa Općinskog vijeća, te istakao nadu da će Općinsko vijeće sa načelnikom zajednički rješavati i druge probleme, a sve u cilju osiguranja ugodnijeg života za građane Ilidže.

Na donaciji je zahvalio Avdo Vatrić, v.d direktor Grasa koji je kazao da je svaka pomoć dobrodošla.

„Ovo je mali korak ka našoj budućoj saradnji i pokazuje da svi zajedno možemo raditi za dobrobit građana. Nadam se da će se na ovaj način poboljšati usluge građanima općine Ilidža i time ponovo steći njihovo povjerenje“ dodao je Vatrić.

Anketiranje privrednika

Početkom mjeseca, tačnije 3. februara 2014. godine, na teritoriji općine Ilidža započela je aktivnost obilaska i poslovnog anketiranja privrednih subjekata. Ovu projektnu aktivnost organizuje Općina Ilidža. Cilj anketa je prikupljanje podataka koji će biti relevantni za donošenje programa i planova razvoja lokalne samouprave i stvaranje uvjeta za privredni razvoj i zapošljavanje.

Nakon analize prikupljenih podataka i sagledavanja stvarnog stanja u oblasti poduzetništva trebalo bi se doći do osnova na kojima treba da se zasniva poslovna politika općine Ilidža, a sve u cilju stvaranja što boljih uvjeta za razvoj privrede. Anketiranje će se vršiti do 3. marta. Podaci prikupljeni anketiranjem su povjerljivi i u skladu su sa odredbama Zakona o statistici FBiH i koristiti će se isključivo u statističke svrhe.

U anketi su sadržana pitanja od ocjene dosadašnjih i dobrih i loših iskustva u radu s Općinom do prioriteta kojima treba da se bavi strateški ekonomski razvoj općine Ilidža.

Prva anketirana firma bila je uspješna ANS Drive. Podaci će se obezbijediti putem popunjavanja pojedinačnih upitnika, a početno iskustvu u anketiranju bilo je pozitivno i korisno. Anketirat će se 1.800 privrednih subjekata.



Održana tribina o pristupanju izradi Regulacionog plana „Stup Nukleus“

Na osnovu Odluke Općinskog vijeća o pristupanju izradi Regulacionog plana „Stup Nukleus“, 28. februara 2014. godine u prostorijama Općine Ilidža održana je prva tribina o ovom dokumentu. Tribini su prisustvovali predstavnici Općine, javnih komunalnih preduzeća Kantona Sarajevo, kantonalna ministarstva saobraćaja i prostornog uređenja i zaštite okoliša, Zavoda za planiranje razvoja i Zavoda za izgradnju Kantona Sarajevo, te savjeti mjesnih zajednica Stup II i Stupsko brdo koji su upoznati o pristupanju izradi novog RP, te da kao nosioci, odnosno subjekti planiranja svojim prijedlozima uzmu aktivno učešće u pripremi i izradi ovog planskog dokumenta. Izabrani izvođač će u narednom periodu vršiti snimanje postojećeg stanja na terenu na prostoru ove dvije mjesne zajednice. Nakon pripreme osnovnog koncepta održat će se i druga tribina nakon čega slijedi javna rasprava.



RVI Ilidža uručili zahvalnice doktorima

Udruženje ratnih vojnih invalida Ilidža je 25. februara 2014. godine uručilo plaketu i zahvalnice čuvarima zdravlja, odnosno medicinskom osoblju koje godinama uvažava status boračke populacije te time pokazuje svoju profesionalnost na najvećem nivou.

Ovu dodjelu zahvalnica Udruženje ratnih vojnih invalida realizovalo je s ciljem zahvale svima koji su nesebičnim zalaganjem u domenu svog djelovanja pomogli da se pripadnici ove populacije poštuju kao korisnici s pravom prvenstva u određenim postupcima s obzirom na status koji imaju. Ovom prilikom dodijeljena su: plaketa mr.sc. Hadžanu Konji, zahvalnice prim. dr. Amiru Ahmetoviću i doc.dr. Đemilu Omeroviću.

Udruženje ratnih vojnih invalida je 26. februara 2014 godine uručilo zahvalnicu M.D.D. „Merhamet“, Osnovnom odboru Ilidža zbog uspješno realizovanog projekta podjele kurbanskog mesa. Udruženje ratnih vojnih invalida Ilidža je u saradnji sa Merhametom podijelilo pet tona mesa ukupne vrijednosti 25.000,00 KM a podjelom je



obuhvaćeno 500 invalida koji su dobili po 5 kg. mesa. Dodjelom zahvalnice Merhametu koju je preuzeo efendija Berilo Mujo iskazuje se iskrena zahvala u ime Udruženja i invalida kojima je ova podjela sigurno mnogo značila uzimajući u obzir krizu i nezaposlenost u našem društvu.

Udruženje Aleja obilježilo Dan nezavisnosti

Povodom Dana nezavisnosti, 1.marta, Ekološko udruženje Aleja održalo je svečanu sjednicu, na kojoj su se članovi udruženja podsjetili na historijski trenutak 1. mart, jedan od najvažnijih događaja u novijoj historiji Bosne i Hercegovine. Na sjednici se razgovaralo o referendumu i dešavanjima prije i poslije referenduma, a također i da je BiH internacionalno priznata država, koja kao ostale države ima svoj Dan nezavisnosti.

Ekološko udruženje Aleja će i u budućnosti obilježavati sve datume od značaja za BiH, te direktno učestvovati, uspostaviti saradnju sa drugim NVO, te uticati na podizanju svijesti građana, posebno mladih ljudi o značaju i važnosti obilježavanja državnih praznika.



Paketi za ratne vojne invalide

Udruženje ratnih vojnih invalida Ilidža u saradnji sa Udruženjem ratnih vojnih invalida Kantona Sarajevo, 20. februara 2014. godine u prostorijama restorana Bazeni realizovalo je još jednu u nizu akcija pomoći svojim članovima. Ovom prilikom podijeljeni su paketi za ratne vojne invalide čija invalidnost je 50 posto. Vrijednost paketa sa osnovnim prehrambenim i higijenskim artiklima je 50 KM. Ovaj projekat koštao je 7.500 KM, a pakete je dobilo 150 članova RVI Ilidža.





Očišćena pješačka staza u MZ Rakovica

Građani Mjesne zajednice Rakovica 09. februara 2014. godine su u saradnji sa savjetom i sekretarom ove mjesne zajednice organizovali akciju čišćenja blata sa pješačke staze na Rakovičkoj cesti i platoa ispred Doma kulture i osnovne škole. Blato je očišćeno sa svih površina, koje su nanešene gradnjom koridora 5-C.

Općina Ilidža 10. februara 2014. godine je u saradnji sa KJKP "RAD" sa tri cisterne oprala te površine i sada je građanima a naročito djeci koja se svakodnevno kreću prema osnovnoj školi omogućen uredan prilaz.



Obilježeno 15 godina mladih Crvenog križa

U Multimedijalnoj sali Općine Ilidža u periodu od 20. do do 23. februara 2014. godine održana je Konferencija mladih Crvenog križa Ilidža, a povodom obilježavanja 15 godina od osnivanja prve grupe mladih u Crvenom križu Ilidža.

Zvaničnom dijelu Konferencije su prisustvovali volonteri i gosti iz drugih organizacija Crvenog križa u BiH, Srbiji, kao i specijalni gosti iz Crvenog križa Lambach iz Austrije, te gosti i zvaničnici iz prijateljskih organizacija i udruženja. Konferenciji je također prisustvovao određeni broj vijećnika iz Vijeća Općine Ilidža, koji su imali priliku pogledati šta su to sve volonteri CK Ilidža uspjeli uraditi i postići u protekloj godini.

Otvorena biblioteka u Desetoj osnovnoj školi

U Desetoj osnovnoj školi Ilidža 6. februara 2014. godine svečano je otvorena biblioteka.

„ Za nas je ovo zaista poseban dan. Ovo je rezultat višemjesečnih nastojanja i zalaganja za projekt opremanja školske biblioteke. Iako je potrajalo malo duže, što je uveliko otežavalo časove lektire, to ne umanjuje naše zadovoljstvo i sreću što smo skoro u potpunosti ostvarili cilj i time usrećili oko 600 učenika. Zahvalni smo svim ljudima koji su dali doprinos u realizaciji ovog projekta. Sve knjige koje smo nabavili su obavezna lektirna djela što će pomoći učenicima a i nastavnicima u realizaciji lektire“ kazao nam je Sudo Lavić, direktor Desete osnovne škole Ilidža

Biblioteka posjeduje 1000 naslova.





Uručene zahvalnice

Na Skupštini Udruženja antifašista i boraca NOR-a Ilidža 24. februara uručene su zahvalnice prijateljima koji pružaju podršku radu ovom udruženju. Zahvalnice su dobili Udruženje antifašista boraca iz Vogošće, komanda logistike Oružanih snaga BiH, Udruženje NOR-a iz Bajine Bašte i Savez udruženja boraca NOR-a iz Užica.



Kenan Jahić donio zlato

U Karlovcu 8. i 9. februara 2014. godine održan je Evropski kup za juniore i seniore u kick-boxu. Na turniru je nastupilo 1.200 takmičara iz 14 zemalja. Takmičari Kick-boxing akademije Ilidža osvojili su jedno zlato i dvije srebrne medalje u juniorskoj konkurenciji. Zlatnu medalju osvojio je Kenan Jahić u kategoriji juniora do 67 kilograma, a srebrne Edin Sinanović i Asmir Tahirović.

Sljedeći nastup očekuje se 15. marta na tradicionalnom međunarodnom turniru „Ilidža open“ na kojem se očekuje 500 takmičara iz sedam zemalja.



Prijem za Čongu

Juniorski reprezentativac BiH u karateu Anes Čongo osvojio je zlatnu medalju na Evropskom prvenstvu u portugalskom Lisabonu u kategoriji juniora +76 kg. Naš takmičar je u finalnom dvoboju savladao reprezentativca Rusije s uvjerljivih 5:3. Anes je član karate kluba „Champion“ Ilidža, škole majstora karatea Denisa Muhovića i Dine Tabakovića. Tim povodom 17. februara u Općini Ilidža, načelnik prof. dr. Senaid Memić upriličio je prijem za ovog šampiona i njegovog trenera.

“Podrška ovakvim takmičarima je neupitna, oni su naš ponos, naši ambasadori. Ovo su mi najdraži poslovi kad primam mlade i uspješne ljude kao i ovog našeg zlatnog sportistu koji je dostojenstveno predstavio boje države, a i Općine. Kao i do sada, Općina će podržavati, u okviru svojih materijalnih mogućnosti pratiti njihov daljnji razvoj i uspjeh,” kazao je između ostalog Memić.

On je obećao i da će Općina obezbijediti stipendiju za Anesa Čongu, zlatnog sportistu.



Učenci Četvrte osnovne škole obilježili Dan nezavisnosti BiH

U prostorijama Četvrte osnovne škole u Hrasnici, 28. februara 2014. godine učenci i nastavnici priredili su svečanu akademiju povodom 1. marta, Dana nezavisnosti Bosne i Hercegovine. U prisustvu velikog broja roditelja, nastavnika i gostiju učenci ove škole su izveli bogat i raznovrstan program kojim su istakli važnost i značaj ovog datuma u hiljadugodišnjem postojanju naše zemlje. Prisutni su uživali u horskim, recitatorskim i dramskim tačkama učenika.



Bez poraza u drugom djelu prvenstva

Trenutno četvrti na tabeli košarkaši Igmana postigli su četiri uzastopne pobjede. Cilj je završiti drugi dio prvenstva bez poraza i plasirati se u play off za ulazak u A-1 ligu. Trener ekipe je Suad Muzur sa igračima: Edi Šipka, Goran Perc, (kapiten) Amar Salčin, Nedim Salčin, Adnan Tiganj, Dejan Petković, Arian Radan, Rijad Jamaković, Nedim Halilagić, Vanja Čatović, Kenan Arslanović, Damir Kustura, Miloš Šušić, Admir Beširević, Ermin Tarčin i Alen Efendić.



MANIFESTACIJE ZA DAN OPĆINE ILIDŽA 2014.

08. i 9. marta 2014. (subota i nedjelja)

9. OTVORENO PRVENSTVO U KARATEU U 10,00 SATI KARATE KLUB „CHAMPION“
KSRC ILIDŽA

12. marta 2014. (srijeda)

DAN MZ CENTAR U 10,00 SATI ISPRED MJESNE ZAJEDNICE

12. marta 2014. (srijeda)

SVEČANA SJEDNICA OPĆINSKOG VIJEĆA ILIDŽA U 14,00 SATI
MULTIFUNKCIONALNA SALA OPĆINE ILIDŽA

15. marta 2014. (subota)

VI „ILIDŽA OPEN 2014“ KICK BOX-U U 11,00 SATI
KSRC ILIDŽA

15. marta 2014. (subota)

VEČE SEVDAHA U 20,00 SATI RKD PROLETAR
MULTIMEDIJALNA SALA

22. marta 2014. (subota)

VEČE FOLKLORA U 19,30 SATI KUD „EKREM MUJKIĆ“
MULTIMEDIJALNA SALA

23. marta 2014. (nedjelja)

DRAMSKA PREDSTAVA U 19,30 SATI KUD „EKREM MUJKIĆ“
MULTIMEDIJALNA SALA

28. marta 2014. (petak)

KONCERT MUZIČKOG ANSAMBLA „HIMNA“ I DJEČIJIH FOLKLORNIH GRUPA
UDRUŽENJA ZA DJECU I MLADE „NOMINATIV“ U 19,00 SATI SRK KRIS KROS I
UDRUŽENJE ZA DJECU I MLADE „NOMINATIV“
MULTIMEDIJALNA SALA

29. marta 2014. (subota)

4. MUZIČKI FESTIVAL DJECA PJEVAJU HITOVE
„MOJ HIT JE DAR, ILIDŽI ZA ROĐENDAN“ U 19,00 SATI SRK KRIS KROS
MULTIMEDIJALNA SALA

30. marta 2014. (nedjelja)

TREĆA VEČER POEZIJE „ILIDŽO, U SRCU I STIHU TE NOSIM“ U 19,00 SATI
UDRUŽENJE ZA DJECU I MLADE „NOMINATIV“
MULTIMEDIJALNA SALA